



Adresa: **Ul.H.Čemerlića 39A**
71000 Sarajevo
<http://www.voda.ba>

tel. +387 33 726 444
fax. +387 33 726 423
e – mail: info@voda.ba

Broj: **UP-I/25–1-40-609-4/13**

Datum: 23.09.2013. godine

«Agencija za vodno područje rijeke Save» Sarajevo rješavajući po zahtjevu Ministarstva privrede Kantona Sarajevo za donošenje rješenja o prethodnoj vodnoj saglasnosti za zahvat podzemnih voda sa izvorišta „Vilenac“ u Blažuju, općina Ilidža, a na osnovu podnešenog zahtjeva za dodjelu koncesije za zahvatanje voda od strane „TELOPTIC“ d.o.o. Sarajevo, na osnovu člana 113. stav 1., člana 139. stav 1. tačka 1. Zakona o vodama («Službene novine Federacije BiH», broj 70/06) i člana 200. Zakona o upravnom postupku («Službene novine Federacije BiH», broj 2/98 i 49/99), donosi

RJEŠENJE **o prethodnoj vodnoj saglasnosti**

1. Daje se prethodna vodna saglasnost koncesionaru Ministarstvu privrede Kantona Sarajevo za zahvatanje pitke podzemne vode iz bušotine izvedene na lokalitetu „Vilenac“ na zemljištu označenom kao k.č. broj 735, 736 i 737 K.O. Blažuj, općina Ilidža, sa dubine od 250 m, a u postupku dodjele koncesije pravnom licu.
2. Prethodna vodna saglasnost, za nosioca koncesije, se daje pod slijedećim uslovima:
 - 2.1. Da se količina zahvatanja pitke podzemne vode na izvorištu „Vilenac“ vrši u skladu sa izdatim rješenjem broj: 06-18-217/11 od 13.12.2011. godine Federalnog ministarstva energije, rudarstva i industrije, odnosno u skladu sa bilansnim rezervama kategorije $A+B+C_1=22$ l/s.
 - 2.2. Da se do donošenja Odluke o provođenju zaštite izvorišta, izvrši fizička zaštita izvorišta „Vilenac“, odnosno bušotine, izgradnjom ograde, u cilju zaštite od zagađenja i drugih nepovoljnih uticaja na zdravstvenu ispravnost vode i izdašnost izvorišta.
 - 2.3. Da se u roku *od 6 (šest) mjeseci* od dana dobijanja koncesije izradi Projekat o uspostavljanju zona sanitarne zaštite izvorišta sa prijedlogom mjera zaštite izvorišta „Vilenac“ u Blažuju. Zone sanitarne zaštite treba da su formirane u skladu sa Pravilnikom o uslovima za određivanje zona sanitarne zaštite i zaštitnih mjera za izvorišta vode koje se koriste za piće („Službene novine Federacije BiH“, broj 88/12) i isti u roku od 1 (jedne) godine od dana dobijanja koncesije sprovede na lokalitetu.
 - 2.4. Da se u roku *od 3 (tri) mjeseca* od dana dobijanja koncesije izradi i reviduje investiciono-tehnička dokumentacija na nivou Glavnog projekta za objekat bunara sa pumpnim postrojenjem i postrojenjem za dezinfekciju vode. U sklopu objekta neposredno iza pumpe predvidjeti ugradnju automatskog vodomjera za evidentiranje zahvaćenih količina vode.
 - 2.5. Da se u što kraćem roku, a ne dužim *od 3 (tri) mjeseca* od dana dobijanja koncesije, izvrši ugradnja nivomjera za mjerenje nivoa podzemnih voda, kao i sonde za uzimanje uzoraka voe, te redovno vrši praćenje nivoa i kvaliteta zahvaćene vode.
3. Pravno lice , odnosno nosioc koncesije, u skladu sa članom 113. Stav 3. Zakona o vodama dužno je pribaviti ostale vodne akte, tj. vodnu saglasnost i vodnu dozvolu za zahvatanje voda sa izvorišta „Vilenac“.

4. Ova prethodna vodna saglasnost, nakon dobijanja koncesije od strane nosioca koncesije, koristiće se i za pribavljanje urbanističke saglasnosti za izgradnju objekata na izvoru.
5. Prethodna vodna saglasnost, obzirom da se radi o izvoru koje se već koristi, se daje sa rokom važenja od **1 (jedne) godine** od dana izdavanja ovog rješenja, odnosno do **20.09.2014. godine**.

O b r a z l o ž e n j e

Ministarstvo privrede Kantona Sarajevo, pismenim zahtjevom broj: 07-04-18-17905-1 od 19.08.2013. godine obratilo se ovoj Agenciji sa zahtjevom za donošenje rješenja o prethodnoj vodnoj saglasnosti, a u postupku dodjele koncesije, za zahvatanje pitke podzemne vode na izvoru „Vilenac“. Lokacija izvorišta je na parcelama k.č. 735, 736 i 737 K.O. Blažuj, općina Ilidža, Sarajevo.

U provedenom postupku dostavljena je i pregledana slijedeća dokumentacija:

- Kopija rješenja o registraciji u sudski registar Općinskog suda u Sarajevu subjekta upisa „TELOPTIC“ d.o.o. Sarajevo broj: 065-0-Reg-11-002369 dana 08.12.2011. godine izdatog od strane Općinskog suda u Sarajevu
- Kopija Uvjerenja o registraciji/upisu u Jedinstveni registar obveznika indirektnih poreza TELOPTIC d.o.o. Sarajevo, broj: 04/1-UPJR/1-6909-2/07 dana 08.08.2007. godine od strane Uprave za indirektno-neizravno oporezivanje Banja Luka
- Kopija uvjerenja o poreznoj registraciji izdatoj od strane Porezne uprave – Kantonalni ured Sarajevo dana 11.11.2002. godine;
- Dokaz o uplaćenju administrativnoj taksi (biljezi federalne administrativne takse u iznosu od 3 KM) i upravne pristojbe u iznosu od 80 KM na račun javnih prihoda Budžeta Federacije Bosne i Hercegovine kod UniCredit Bank br. 338-900-22115294-91, vrsta prihoda 722112, na ime izdavanja prethodne vodne saglasnosti (Zakon o federalnim upravnim pristojbama i Tarifi federalnih upravnih pristojbi – «Službene novine FBiH» broj 06/98, 8/00, 45/10 i 43/13).
- Kopija Rješenja Federalnog ministarstva energije, rudarstva i industrije broj: 06-18-217/11 od 13.12.2011. godine, kojim se potvrđuju geološke rezerve i kvalitet podzemne vode izvorišta „Vilenac“ na lokalitetu „Blažuj“, općina Ilidža
- Kopija Odluke o davanju saglasnosti od strane Općinskog vijeća Ilidža prevrednom društvu „TELOPTIC“ d.o.o. Sarajevo za postupak provođenja dodjele koncesije na izvoru „Vilenac“ na lokalitetu Blažuj.
- Izvod iz urbanističkog plana za k.č. broj 735, 736 i 737 K.O. Blažuj od 05.06.2012. godine
- Izvještaj o provedenim geološkim i hidrogeološkim istraživanjima kraškog vodonosnika na lokalitetu „Blažuj“, općina Ilidža, dat od strane „GEA“ d.o.o. Tuzla
- Studija uticaja na okoliš hidrogeoloških istraživanja podzemnih voda za potrebe kompanije „TELOPTIC“ d.o.o. Sarajevo

Pregledom dostavljene dokumentacije utvrđeno je sljedeće:

- Hidrogeološka istraživanja pitkih podzemnih voda kraškog akvifera za potrebe kompanije „Teloptic“ d.o.o. Sarajevo vršena su na lokalitetu „Mostrasko raskršće“ – Blažuj, koje se nalazi 10 km zapadno od Sarajeva. Istražni prostor definisan je Rješenjem Federalnog ministarstva energije, rudarstva i industrije Mostar, prelomnim tačkama A, B, C, D i E.
- Izvorište „Vilenac“ (bunar T-1) nalazi se u neposrednoj blizini prelomne tačke a ispitnog poligona čije su koordinate Y 6 520 000 i X 4 855 750.

- Eksploatacija pitkih voda, iz akumulacije podzemnih voda sa slobodnim nivoom koja je formirana unutar stijenskih masa intergranularne i stijenskih masa kaverozno-pukotinske poroznosti, planirana je za potrebe tehnološkog procesa proizvodnog programa „Teloptic“ d.o.o. Sarajevo, odnosno Sinalca i Milkosa.
- Zahvatanje vode će se vršiti na lokalitetu „Vilenac“, crpljenjem iz bušenog bunara čija je dubina 250 m, a profil cijevi ϕ 146 mm.
- Fizičko-hemijske i bakteriološke analize vode ovog akvifera pokazuju da se radi o vodi dobrog kvaliteta, koja svojim osobinama u cjelosti odgovara uslovima Pravilnika o higijenskoj ispravnosti vode za piće („sl. Glasnik BiH“, broj 40/10).

Kompanija „Teloptic“ pored proizvodnje mlijeka, mliječnih proizvoda i sokova ima u planu pakovanje prirodne izvorske vode za piće, proizvodnju gazirane i aromatiziranje vode. Trenutne potrebe ove kompanije za vodom su u količini od 10 l/s.

Na osnovu proračuna i testiranja izdašnosti eksploatacionog bunara T-1 utvrđeno je da se moguća eksploatacija ovog bunara i to:

- ✚ Za sniženje nivoa od 2,0 m zahvata se 8,8 l/s, rez. A kategorije,
- ✚ Za sniženje nivoa od 4,0 m zahvata se 7,7 l/s, rez. B kategorije,
- ✚ Za sniženje nivoa od 6,0 m zahvata se 5,5 l/s, rez. C₁ kategorije,

što znači da ukupne bilansne rezerve iznose 22 l/s, odnosno 693.792 m³/godišnje.

Proširenjem proizvodnih kapaciteta planirana je izgradnja novog bunara i potrošnja vode od 20 l/s.

Shodno odredbama Pravilnika o klasifikaciji i kategorizaciji rezervi podzemnih voda i vođenjem evidencije o njima („Sl. List SFRJ“, broj 34/79), pitke podzemne vode se razvrstavaju samo kao bilansne rezerve, tako da rezerve pitkih podzemnih voda krečnjačkog akvifera za zahvat „Vilenac“ iznose $Q = A+B+C_1 = 22$ l/s.

Nosiocu koncesije su tačkom 2. dispozitiva ovog Rješenja utvrđeni uslovi pod kojim se izdaje prethodna vodna saglasnost, u skladu sa članom 14. Pravilnika o sadržaju, obliku, uvjetima, načinu izdavanja i čuvanja vodnih akata («Sl. novine FBiH», broj 6/08, 57/09, 72/09 i 68/12).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,00 KM takse, prema tarifnom broju 3. Tarife federalnih administrativnih taksi.

Voditelj postupka

Aida Bezdob, dipl.ing.građ.

**Po ovlaštenju
Rukovodilac sektora za
izdavanje vodnih akata**

Haris Ališehović, dipl.inž.građ.

Dostaviti:

- Ministarstvo privrede Kantona Sarajevo
Reisa Dž. Čauševića br. 1 (sa dokumentacijom)
- „Teloptic“ d.o.o. Sarajevo, ul. Mostarsko raskršće bb, 71240 Hadžići
- AVP Sava, ISV-vodna knjiga
- Org.jed. 40 - arhiva